

Na osnovu člana 25. Statuta Vanjskotrgovinske/Spoljnotrgovinske komore Bosne i Hercegovine („Službeni glasnik BiH“, broj 52/14 I 19/18) i člana 6. Pravila za uspostavljanje vinske ceste, Upravni odbor Vanjskotrgovinske/Spoljnotrgovinske komore BiH, na sjednici održanoj 14.03. 2023.godine, donio je

## **PRAVILNIK**

### **O VINSKOJ CESTI HERCEGOVINE**

#### **I OPŠTE ODREDBE**

##### **Član 1.**

Ovim Pravilnikom uspostavlja se okvir za upravljanje i koordinisanje aktivnosti Vinske ceste Hercegovine.

Vinska cesta Hercegovine je integrisani turistički proizvod sastavljen od ponude vina i tradicionalnih i tipičnih proizvoda sa teritorijalnog područja Hercegovine, turističke ponude i ponude ugostiteljskih usluga na tom prostoru.

Vinskom cestom Hercegovine promoviše se Hercegovina kao regija prepoznatljiva po svojim jedinstvenim enogastronomskim, prirodnim i kulturnim resursima, kako u BiH, tako i u inostranstvu.

##### **Član 2.**

Ovim pravilnikom utvrđuju se članstvo i način učlanjenja u Vinsku cestu Hercegovine (u daljem tekstu:Vinska cesta), elementi za označavanje, formira Savjet za upravljanje Vinskom cestom Hercegovine i propisuje njegova nadležnost, ustanovljava Komisija za kontrolu uslova Vinske ceste Hercegovine i njena nadležnost, propisuje obavljanje stručnih i administrativnih poslova, propisuje nadzor nad sprovođenjem akata Vinske ceste Hercegovine i utvrđuje načina finansiranja.

##### **Član 3.**

Pod tradicionalnim i tipičnim proizvodima Hercegovine u smislu ovog pravilnika podrazumijevaju se vino, kao centralni proizvod Vinske ceste Hercegovine, proizvedeno od vinskih sorti grožđa, razne vrste sira, med, šipak, smokva, hercegovački pršut i drugi proizvodi tipični za teritorijalno područje Hercegovine.

#### **II ČLANOVI VINSKE CESTE**

##### **Član 4.**

Članstvo u Vinskoj cesti je dobrovoljno, a članovi mogu biti pravna lica, samostalne radnje bez svojstva pravnog lica i fizička lica koja su registrovana za proizvodnju i prodaju vina iz vlastite proizvodnje ili drugu djelatnost koja je u funkciji turističke ponude.

U Vinsku cestu se mogu učlaniti i:

- a) pravna lica, samostalni obrtnici i fizička lica koja su registrovana za proizvodnju i valorizaciju tradicionalnih i tipičnih hercegovačkih poljoprivredno-prehrambenih proizvoda, ugostitelji (restorani i konobe), tur operateri, hotelski i drugi smještajni kapaciteti, zanatlije i slično;
- b) pravna lica koja su registrovana za obavljanje poljoprivredne djelatnosti: proizvodnju i prodaju voćnih vina, jakih alkoholnih pića i napitaka iz vlastite proizvodnje;
- c) pravna lica koja pretežno djeluju na tržištu teritorije Hercegovine, a koja su registrovana za obavljanje ugostiteljsko-turističke djelatnosti: pripremanje hrane i pružanje usluga prehrane, pripremanje i usluživanje pića i napitaka, pružanje usluga smještaja, ili za obavljanje drugih djelatnosti kojima se doprinosi unapređenju ukupne turističke ponude teritorije Hercegovine;
- d) institucije lokalne samouprave, gospodarske/privredne komore regije/županije/kantona i turističke organizacije koje djeluju na teritoriju Hercegovine;
- e) druga pravna lica, institucije, registrovani samostalni obrtnici i registrovana fizička lica sa područja Hercegovine čija je djelatnost u funkciji poboljšanja turističke ponude.

Članovi moraju biti registrovani u skladu sa važećim propisima u BiH za obavljanje djelatnosti po osnovu koje se učlanjuju u Vinsku cestu.

Članovi Vinske ceste po funkciji su Privredna komora Republike Srpske i Privredna/Gospodarska komora Federacije BiH.

Vanjskotrgovinska/Spoljnotrgovinska komora BiH (u daljem tekstu: Komora) vodi registar članova Vinske ceste.

Sa ciljem što efikasnijeg upravljanja Vinskom cestom Komora će potpisati memorandum o saradnji sa lokalnim zajednicima kojim će detaljnije biti uređene aktivnosti u smislu promocije i doprinosa prepoznatljivosti Vinske ceste.

#### **Član 5.**

Član Vinske ceste (u daljem tekstu: član) ima interes da očuva i unaprijedi svoju proizvodnju i usluge kroz promociju hercegovačke regije.

Član će promovisati, nuditi i prodavati svoje proizvode ili usluge i na taj način unapređivati svoju ponudu i ruralni turizam u Hercegovini generalno.

Član je dužan konstantno raditi na očuvanju kvalitete svoje ponude, unapjeđenju svojih proizvoda i promocije cijele regije Hercegovine uz poštovanje svih zakonskih i podzakonskih obaveza koje regulišu njegovu djelatnost.

### **III OZNAČAVANJE VINSKE CESTE**

#### **Član 6.**

Vinska cesta označava se stiliziranim znakom kao obilježjem Vinske ceste.

## **Član 7.**

Obilježjem se označavaju i kategorizuju objekti članova, informacijske table, punktovi, karta područja ili teritorija Vinske ceste, prilazni putevi, pješačke, biciklističke staze i sl.

Pravo na korištenje obilježja imaju isključivo članovi Vinske ceste.

## **Član 8.**

Izgled stilizovanog znaka definisan je u Prilogu I ovog pravilnika, a označavanje i isticanje znaka Vinske ceste propisuje se posebnim aktom Savjeta.

## **IV UPRAVLJANJE VINSKOM CESTOM, STRUČNI I ADMINISTRATIVNI POSLOVI**

### **1. Savjet Vinske ceste**

## **Član 9.**

Poslovima i aktivnostima Vinske ceste upravlja Savjet Vinske ceste (u daljem tekstu: Savjet).

Mandat Savjeta je da olakšava razvoj i promociju Vinske ceste kao destinacije vinskog turizma na domaćem, regionalnom i međunarodnom nivou.

Strateški ciljevi Savjeta su: razviti i uvesti vinarstvo u turistički proizvo; olakšati uniju zainteresovanih strana u postizanju zajedničkih interesa Vinske ceste kao destinacije; podsticati ekonomski razvoj promocijom Vinske ceste i povećanje potražnje; uspostaviti marketinške mreže, lokalno i regionalno, za promociju regije Vinske ceste; generisati sredstva od članstva, događaja, sponzorstava i donatorskih agencija i raspoređivati ta sredstva za prioritete razvojne inicijative Vinske ceste; podići svijest zajednice o važnosti vinskog turizma i podsticati i podržavati lokalno učešće u turističkim aktivnostima te zagovarati, uicati i omogućiti razvoj, promociju i rast Vinske ceste.

## **Član 10.**

Savjet donosi potrebne provedbene akte, prati i analizira aktivnosti i svojim stavovima doprinosi razvoju, promociji i unapređenju Vinske ceste.

Nadležnosti Savjeta su:

- a) razmatra i donosi godišnji plan aktivnosti i godišnji finansijski plan Vinske ceste;
- b) usvaja set politika vođenih održivim turizmom u cilju boljeg funkcionisanja Vinske ceste;
- c) imenuje članove stručne Komisije za kontrolu uslova Vinske ceste;
- d) utvrđuje visinu članarine, rokove i način plaćanja;
- e) donosi odluku o prijemu u članstvo Vinske ceste na prijedlog Komisije za kontrolu uslova Vinske ceste;
- f) na prijedlog Komisije za kontrolu uslova Vinske ceste donosi odluku o postavljanju ili uklanjanju obilježja Vinske ceste;

- g) na prijedlog Komisije za kontrolu uslova Vinske ceste donosi mjere iz člana 25. ovog Pravilnika;
- h) obavlja i druge poslove koji su u cilju realizacije strateških ciljeva iz člana 9., donosi odluke i provedbene akte neophodne za funkcionisanje Vinske ceste.

### **Član 11.**

Savjet ima 13 članova, i to:

- a) šest predstavnika proizvođača vina;
- b) dva predstavnika članova koji kao osnovnu obavlja ugostiteljsku djelatnost;
- c) dva predstavnika članova koji kao osnovnu obavljaju djelatnost turističke agencije sa relevantnom ponudom;
- d) jedan predstavnik Spoljnotrgovinske komre BiH;
- e) jedan predstavnik Privredne komore Republike Srpske i
- f) jedan predstavnik Privredne komore Federacije BiH.

Sjednicama Savjeta obavezno prisustvuje generalni sekretar Komore.

Po ukazanoj potrebi, na sastanke Savjeta se pozivaju i predstavnici lokalnih samouprava, relevantnih turističkih organizacija i zajednica i drugih relevantnih subjekata.

### **Član 12.**

Članove Savjeta prethodnog člana imenuje Upravni odbor Komore, na mandatni period od četiri godine, pri čemu je broj mandata neograničen.

Članove Savjeta predlaže predsjednik Komore, i to članove iz tačaka a), b) i c) prethodnog člana na osnovu prijedloga odgovarajućih oblika udruživanja u Komori, a članove iz tačaka e) i f) na osnovu prijedloga entitetskih privrednih komora.

### **Član 13.**

Savjet radi u sjednicama koje se održavaju prema potrebi, a najmanje dva puta godišnje.

Savjet iz reda svojih članova bira predsjednika i zamjenika predsjednika Savjeta.

Savjet može punovažno raditi i odlučivati ukoliko sjednici prisustvuje najmanje devet (9) članova.

Stavove, preporuke i odluke Savjet donosi u pravilu konsenzusom, a ako se ne postigne konsenzus, smatra se donešenom ona odluka za koju je glasalo najmanje devet članova Savjeta.

Savjet donosi Poslovnik o radu kojim se bliže uređuje način njegovog rada.

## **2. Komisija za kontrolu uslova Vinske ceste**

### **Član 14.**

Komisija za kontrolu uslova Vinske ceste (u daljem tekstu:Komisija) je stručno tijelo koje se sastoji od pet članova od kojih su dva člana zaposlenici Komore.

Zaposlenike Komore koji su članovi Komisije Savjetu predlaže generalni sekretar Komore.

Po ukazanoj potrebi Savjet može proširiti Komisiju vanjskim članom, stručnjakom za pojedina pitanja iz nadležnosti Komisije

### **Član 15.**

Komisija u skladu sa ovim pravilnikom i drugim provedbenim aktima nadležna je da:

- a) provodi postupak ispitivanja ispunjenosti uslova po zahtjevu za učlanjenje i u skladu s tim predlaže učlanjenje u Vinsku cestu, odnosno odbijanje zahtjeva za članstvo;
- b) predlaže izricanje mjera zbog nepridržavanja pravila Vinske ceste.

Komisija radi u sjednicama koje se održavaju po ukazanoj potrebi.

### **Član 16.**

Sve odluke iz svoje nadležnosti Komisija donosi konsenzusom.

Ukoliko se ne postigne konsenzus, član Komisije koji se ne slaže sa odlukom obavezan je svoj stav pismeno obrazložiti.

## **3. Stručni i administrativni poslovi**

### **Član 17.**

Stručni, administrativni i tehnički poslovi za Vinsku cestu, Savjet i Komisiju obavljaju se u Upravi stručnih poslova Komore po nalogu generalnog sekretara Komore.

Vinska cesta ima sekretara koji je zaposlenik u organizacionoj jedinici Uprave stručnih poslova Komore nadležnoj za problematiku turizma, vinskog turizma i poljoprivredno prehrambenog sektora privrede.

## **V POSTUPAK UČLANJENJA U VINSKU CESTU**

### **Član 18.**

Pravna i fizička lica koja imaju interes da budu članovi Vinske ceste podnose zahtjev Komori za učlanjenje u Vinsku cestu na propisanom obrascu zahtjeva.

Uz Zahtjev iz prethodnog stava dostavlja se:

- a) izvod iz sudskog registra za pravna lica, izvod ili rješenje nadležnog opštinskog organa za samostalnu radnju bez svojstva pravnog lica, odnosno kopija osobne iskaznice za fizička lica;
- b) izvod iz relevantnog registra poljoprivrednih domaćinstava, destilatera ili drugog registra, ili rješenje o odobrenju objekta za proizvodnju i prodaju vina i voćnih vina;
- c) rješenje o minimalnim tehničkim uslovima za pružanje ugostiteljskih usluga ili usluga ruralnog domaćinstva;
- d) ukoliko se radi o proizvođaču vina, rješenje nadležne institucije kojim se dokazuje da podnosilac zahtjeva proizvodi najmanje jedno vino s zaštićenom oznakom izvornosti;
- e) drugu dokumentaciju iz koje je vidljivo da podnosilac zahtjeva zadovoljava uslove iz ovog pravilnika za uključenje u Vinsku cestu.

#### **Član 19.**

Podnosioci zahtjeva moraju ispunjavati specifične kriterije koji su Prilogom 2. ovog pravilnika propisani po vrsti proizvoda ili vrsti usluge.

Učlanjenje u Vinsku cestu subjekata iz člana 4. stav 2. tačka d) vrši se na osnovu pismenog zahtjeva.

#### **Član 20.**

Komisija provjerava kompletnost Zahtjeva i da li je podnesen u skladu s ovim pravilnikom.

Ukoliko utvrdi da zahtjev nije potpun, Komisija će od podnosioca zahtjeva zatražiti dopunu zahtjeva.

U roku od trideset dana od dan prijema urednog Zahtjeva, Komisija će po potrebi izvršiti uviđaj na licu mjesta i utvrditi da li podnosilac ispunjava propisane uslove.

Komisija u roku od petnaest dana od dana kompletiranja zahtjeva, predlaže Savjetu donošenje odluke o prijemu podnosioca u članstvo Vinske ceste s pravom na korištenje odgovarajuće oznake kategorije privrednog subjekta, odnosno obrazloženi prijedlog o odbijanju zahtjeva.

#### **Član 21.**

Na osnovu odluke o prijemu u članstvo, generalni sekretar Komore sa članom Vinske ceste potpisuje ugovor.

Potpisivanjem ugovora član ima sva prava i obaveze utvrđene ovim pravilnikom i drugim aktima vezanim za Vinsku cestu.

#### **Član 22.**

Član Vinske ceste u obvezi je da konstantno komunicira sa Sekretarom Vinske ceste i Komisijom radi korektnog prenošenja informacija prema javnosti, putem medija, portala i platformi kojima upravlja Komora. Članovi su dužni da te informacije komuniciraju sa sekretarom Vinske ceste i time omogućavaju Komisiji da ažurira informacije i održi kredibilitet svojih platformi.

Član je dužan da obavještava Sekretara Vinske ceste o promjenama jelovnika, degustacija, smještaja i ostalih usluga, o organizovanju edukativnih posjeta, tematskih i promotivnih večera, važnijih degustacija, enogastronomskih i tradicionalnih manifestacija koja se organizuju na području djelovanja Vinske ceste.

## **VI NADZOR**

### **Član 23.**

Komisija redovnim kontrolama nadzire poštovanje propisanih uslova iz ovog pravilnika i drugih akata Vinske ceste.

Komisija vrši vanredne kontrolne preglede u roku od deset dana od zaprimanja obavještenja o eventualnom kršenju odredbi ovog pravilnika, akata Vinske ceste i ugovora iz člana 21. ovog pravilnika.

### **Član 24.**

Ukoliko Komisija utvrdi da je kod člana došlo do smanjenja kvalitete proizvoda ili usluge, odnosno do potpunog ili djelimičnog prestanka proizvodnje ili pružanja usluge, ili da član krši odredbe ovog pravilnika, drugih akata Vinske ceste, odluke Savjeta ili se ne pridržava ugovora iz člana 21., Komisija predlože Savjetu izricanje mjere.

### **Član 25.**

Savjet može izreći mjeru članu Vinske ceste u zavisnosti od težine počinjene povrede.

Za lakšu povredu obaveza utvrđenih ovim pravilnikom, lakšu povredu drugih akata Vinske ceste, odluka Savjeta ili ugovora iz člana 21. Savjet izriče mjeru opomene.

Ukoliko se član ogлуši o mjeru iz prethodnog stave, Savjet izriče mjeru opomene pred isključenje.

Savjet izriče mjeru isključenja iz članstva Vinske ceste za težu povredu obaveza utvrđenih ovim pravilnikom, težu povredu drugih akata Vinske ceste, odluka Savjeta i ugovora iz člana 21. ili u slučaju da se član ogлуši o mjeru opomene pred isključenje.

### **Član 26.**

Odluku o prestanku članstva u Vinskoj cesti Savjet donosi na obrazložen zahtjev člana ili u slučaju trajnog prestanka proizvodnje ili pružanja usluga.

U slučaju prestanka članstva po bilo kojoj osnovi raskida se ugovor iz člana 23. ovog pravilnika i uklanjaju obilježja Vinske ceste.

## **VIII FINANSIRANJE**

### **Član 27.**

Aktivnosti Vinske ceste finansiraju se iz članarine koju plaćaju njeni članovi, donacija, sponzorstava i iz drugih zakonom dozvoljenih izvora sredstava.

Prihodi koji se ostvare po osnovu Vinske ceste vode se na posebnom podračunu Komore i koriste se za finansiranje svih aktivnosti Vinske ceste.

Prihodi i rashodi koji se ostvare, odnosno izvrše na ime Vinske ceste, vode se kao projekat na posebnoj stavci u Finansijskom planu Komore.

## Član 28.

Član Vinske ceste plaća godišnju članarinu.

Visinu članarine, rokove i način plaćanja utvrđuje Savjet.

## IX ZAVRŠNE ODREDBE

## Član 29.

Provedbene akte za čijim donošenjem se ukaže potreba u postupku implementacije Vinske ceste donosi Savjet.

Obrasce i administrativno-tehničke akte za obavljanje administrativnih poslova propisuje generalni sekretar Komore.

Svi akti vezani za rad i funkcionisanje Vinske ceste su javni i objavljuju se na službenoj web stranici Komore.

Sve što nije definisano ovim pravilnikom Savjet u skladu sa svojim nadležnostima propisuje svojom odlukom.

## Član 30.

Sastavni dio ovog pravilnika su:

- a) Prilog I : Izgled obilježja Vinske ceste i
- b) Prilog II: Standardi kvaliteta po vrsti proizvoda ili usluge.

## Član 31.

Ovaj pravilnik stupa na snagu narednog dana od dana donošenja, a objavit će se na službenoj web stranici Komore.

**VANJSKOTRGOVINSKA KOMORA BIH**  
**SPOLNOTRGOVINSKA KOMORA BIH**  
Broj: 01-2-01-2-277-3/23  
Datum: 14.03.2023. godine

**PREDSJEDNIK**  
**UPRAVNOG ODBORA**  
Denis Delić

